

– Ա՛խ, ի՛նչ լաւ էր Սալմաստը, Ֆարիատ, այն այգիները, այն պարտեզները... Այստեղ, այս սարերի մէջ մանր թուփերից աւելի ոչինչ չես տեսնի: Ա՛խ, ի՛նչ լաւ էր այնտեղ:

– Օ՛հ, ես իստակ մոռացայ քո նախաճաշիկը... – ասաց նա եւ վազեց դեպի մերձակայ սենեակը:

Ես մտայ քնարանը, որ միեւնոյն ժամանակ տանուտիրոջ հիւրանոցն էր: Խաթունը, ծերունի որսորդի տնակալուչ պառաւը, արդէն հաւաքել էր իմ քնաշորերը եւ սենեակը սարքել էր: Պառաւի հնացած աչքերը չկարողացան ճանաչել ինձ. նա խիստ կարճատես կերպով նայեց իմ երեսին, ինչ-որ փնթփնթաց քթի տակից, եւ դողդոջուն քայլերով դուրս գնաց:

Քանի ընդմէջ յետոյ, փոքրիկ փայտեայ մատուցարանի վրայ դրած, Մարօն ներս բերաւ իմ նախաճաշիկը, որ բաղկանում էր սերից խառն մեղրի հետ. ես սկսեցի ուտել սպիտակ լաւաշներով: Մարօն կանգնած էր իմ մօտ եւ պտտեցնում էր իւր «թեշին»: Կարծես, այն գեղեցիկ մատները չէին սովորել անգործ մնալ:

– Ֆարիատ, դու շուտով չես գնայ մեր տանից. այդպէս չէ՞, – հարցրեց նա շարունակելով «թեշինէ պտտեցնելը: – Ինչ վատ բուրդ է, սատանան տանէ, որքան աշխատում ես բարակ մանել, գլուխ չէ գալիս:

– Դու ուզո՞ւմ ես, ձեզ մօտ մնամ:

– Ինչո՞ւ չեմ ուզում: Բայց այստեղ լաւ չէ գիւղումը. ես հայրիկին կ'ասեմ մեզ տանէ «օբանէ, այնտեղ լաւ է, շա՛տ լաւ է չադրների մէջ: Առաւօտեան վեր ես կենում, մտիկ ես տալիս չորս կողմի, ամէն տեղ կանաչ է, ծաղիկները վառւում են ուլունքների նման, գառները, ոչխարները թրթռում են դեպի արօտները...:

Սոյն միջոցին յայտնուեցաւ Մըհէի վիթխարի կերպարանքը, նա կիսով չափ կռանալով, անցաւ դռնից եւ կանգնելով շեմքի մօտ, ասաց.

– Ձին հազիր է, – եւ ծուռը կերպով նայելով Մարոյի երեսին, դուրս գնաց:

Ես հրացանս քաշ տալով ուսիցս, պատրաստուեցայ ճանապարհ ընկնել:

– Դու ճանապարհն իմանում ե՞ս, – հարցրեց Մարօն:

– Չեմ իմանում, բայց կը գտնեմ:

– Դժոհար է: Ես քեզ կը հասցնեմ մինչեւ «Ծակ-քարը», այնտեղից ուղիղ ճանապարհ կայ մինչեւ Խանա-սորի ձորը: